

Skirbi pa Ruthy "Lady Ruth" Vrieswijk-Bergen

Sabiduria den nos alegria



NOS a cuminsa wak e salida di e Parada di Luz di Carnaval 71 na canal 22 cu e flamante Sandra y un cabayero cu nos no a haya su nomber. Nos a ripara cu den Vondellaan, na unda e team filmado di canal 22/Top 95 FM ta para, dilanti di nan y na banda di nan no tin e baricadanan cora cu blanco. Un toke bunita pa e pueblo para na banda sinti nan uni cu e participantenan den e gruponan. Nos no sa si ta riba henter e ruta di e Parada di Luz esaki ta asina? Nos no a sigui wak, nos a bay chill den camber scucha dushi musica country via Alexa. Ya pa varios aña nos no ta bay wak ningun parada mas, ta prefera di wak e p'e for di cas na television den un ambiente mas confortabel cu tur cos cerca ey mes. baño, cushina y bo recliner dilanti television. Cu edad aumentando bo interesnan ta cambia y bo ta mas dushi den bo comfortzone rond di bo. Y hopi ta pensa mescos cu Lady Ruth. Tempo nos tabata mas hoben nos tambe a bula baila djodjo den varios parada di Carnaval cu Los Laga Bay y cu Dreamteam St. Cruz. Pa nos, no lo tin e canticanan impactante mas manera tur e canticanan di King Claudius Phillips. Nos no a scucha e festivalnan di tumba y of calypso cu roadmarch e biaha aki na radio ni a wak e na television tampoco. Pero, ta scucha nan na radio Galactica ora nos ta keiro den auto atardi wak e bunita dushi solo baha den lama. Despues di e programa tan gusta y scucha Memories, nan sa bin cu programanan cu musica carnavalesco.

All in all, nos no ta Carnaval minded mas. Preferi di wak un bunita pelicula, pinta of inspira poema, locual nos ta gusta mas y haci hopi hende rond di nos contento cu mi talentonan di scirbi. Prome cu aya bo ta haya mas participante den eleccionnan di reina, awo tur cos ta placa placa placa, manera amiga Philomena Wong den feliz memoria a premira y presinti den su poema di Placa hopi aña pasa, ora cu ya mas y mas por a ripara cu tur kier luhia sin preocupa e debe cu nan tin cu sigui paga despues. Y pa colmo sa rabia tambe ora nan yiu of nieta no sali reina di Carnaval di Aruba. No, shonnan, no ta un joke mas. Pero...ta keda na cada ken pa cu nan mesun decision di curason. Manera ta bisa na Ingles "YOLO", You Only Live Once.

Lady Ruth nunca a gusta e competencianan den eleccionnan di reina durante

aña tampoco, ach, simplemente nos no por cu tanto cosnan falso na hendenan cu normalmente originalmente ta bunita, pero ta tiña, stret cabey, uza wimpers falso di un meter cu nan kier bo mira for di aleu, wowo mitar sera, uffffffffffff, not for me! Tempo Lady Ruth como teenager Ruthy tabata tin 13 of 14 aña, of hasta 15, el a wordo acerca pa participa den competencia di Miss Teenage. Naaaaaaah, nada pa mi! Nos gewoon ta kere cu tur mucha muhe ta bunita riba nan mes. Con bo ta bay scoge entre un Chines, un Hindu, un Africano y un Macamba ofzo? Ta un sorto di discriminacion of no? Enfin, nos ta pro e dushi ambiente alegre si durante e temporada aki di carnaval y nos a decora un parti di nos cas cu mi mesun BAR. Otro cos, awo no ta "Bo amigo didi" mas, awo ta Bar, bo amigo responsabel. Y asina lo sigui, semper lo bin un otro cu su idea y nan ta lubida esnan cu tabata tin caba prome.

Ami tin un "MCP"... Mi chauffeur priva, hahahaha. Laga nos hari un krenchi, pasobra hopi ya a wordo yama nos dilanti pa bay den e mundo mas aya. Nos ta desea e famianan, amigonan y conocirnan cu a despedi di un ser stima hopi condolencia, consuelo y amor. Recorda nan den feliz memoria y semper nan lo ta mas cerca di mente, alma y curason. Tristes ta bay man den man cu alegria tur dia. Nos por tuma bida "One day at a time" cu gradicimento na nos curason y sigui cuida nos mesun salud. Pasa un dushi Carnaval grandi weekend cu ta bin, gosa hopi den famia, y cuida otro. E ta un temporada dushi sigur sin duda, na unda creatividad ta lora su mes den tur sorto di colo den fantasia.

Pabien na tur participantenan y na tur reinanan den nos bunita paradanan den Carnaval 71. Pabien na tur gruponan musical y nan cantantenan. Pabien na tur e scolnan cu a celebra den nan maneranan simpel y colorido tambe e dushi fiesta cultural aki, adapta for di otro partinan di mundo. Lady Ruth no ta desea di papia tocante e beach banda di Strand Politie cu nan a kita for di pueblo na maneranan fini fini pero cu un scop cu pia dobla, pasobra esnan den esaki, no por sigui fingi den un consenshi trankil cu atrobe pa placa placa placa nos muchanan cu nan famia no por sinta bao di e palo di kwihi mas. Ach, toch nos a bisa algo.

Un persona cu a topa nos den supermercado a bisa, cu tur gobierno tin bon y malo, pero cu cada bes e bon ta sigui bira mas malo. Hopi laaf mes! Sin amor pa prohimo riba mesun isla, pero si pa e stranheronan cu ya a haya hopi caba, ta wordo mima cu mas....pa placa placa placa. Amiga Philomena Wong RIP, gran poeta, bo a dal e clabo riba su cabes! Nos ta termina nos relato cu un pabien y danki grandi na Aruba Bank cu otro bunita regalo grandi diki gordo di 100 mil florin na SEPB (Stichting Educacion Profesional Basico) pa promove educacion vocacional y futuro di nos hobennan den area laboral. Ta nan di dos donacion den cuadro di celebracion di 100 aña, un siglo di muestra di confianza di e pueblo di Aruba y e relacion forma di nan cu nos comunidad.

Saludos di Ruthy cu un pic saca na Gloria, un bunita instalacion artistico carnavalesco obra di e gran artista cu estilo unico y super bunita, Elizabeth "Bea" Quilotte Croes.